

DI BESSÔI...

Si visaiso, tal doman dal taramot ducj i sclops e lis cartatucjis che nus àn tratis par vie di chest benedet: «**di bessôi**»?

L'Italie che i leve il cûr, la television che sgurlave apeî, camions di voluntaris che a rivavin di ogni dontri. E il Friûl mieç soterât des maseriis, che al stave a cjâlâ. E alore la fanfare dai mass-medie a convincilu: che al metès il cûr in pâs, che l'Italie no lu varès bandonât, che i varès dade une man a tornâ sù.

Tornâ sù ...!

Ma i furlans, vuaitis, no podevin fâ di mancul di lêi sot vie une certe sodisfazion: cheste volte il Friûl che al veve fat simpri cui siei braçs, no je varès fate. Ur deve un cert intono a viodissal li ingenoglât a domandâ une man. Intant che i melonârs de stampe a sunavin la pive: che i furlans a sintivin che dome l'Italie ju varès salvâts; che al coventave il taramot par fâ l'unitat d'Italie in chest blec di tiere di confin.

Ma ce sucedial ?

**A son passâts doi aigns, e cun lôr si son paidîts i sclops e i lamps, e si son finidis lis cartatucjis: l'Italie e je rivade fint alí. Che parâltri al è il so campo!
E il Friûl al è di bessôi!**

Intindinsi: no di bessôi a rivuart de buine int che par solidaritât umane o par caritât cristiane e je corude a dâ une man, e che dome Diu sa ce che ur vin agrât; ma di bessôi tai confronts di chêi che ur stave, par justizie, di vignî a meti man.

Al è par chest che vuê covente tornâ a sclârî la cuistion a onôr dal vêr, e par che i furlans a sintin che di lôr e dome di lôr e dipent la vite dal Friûl, cu la sô civiltât.

O sin di bessôi tai confronts dal Stât Talian

No stin a pensâ a di chês cuatri cagneris che nus àn stanziadis: al è dome une piçule part dai interès che nus vegnaressin dopo di vê paiât lis tassis, «a fondo perso», di cent agns in ca e des rimessis mandadis dai emigrants di ogni dontri.

Pensin invezit:

- a lis progjetazions che a van dal passio, invoiant la int a lâ;
- al implant confessât di svinidri i piçui borcs, che a son la fonde de culumie agricule e de civiltât paesane dal Friûl;
- a la svalutazion che e mangje ancje la sperance;
- a l'Universitât «sbit», che nus àn dade, tun moment che la nestre civiltât e domandave chest argagn par tignîsi sù;
- a lis cjasis a schirie e ai casermons par scjafoiâ i contadins e i artesans;
- a lis invasions des grandis impresis talianis che si butin a uso falcuçs;
- a la invasion di bassarûi, che a vegnin tal Friûl diventât une grande imprese speculative;
- ai matereâi edilizis che a costin plui achì che no in altró;
- a lis casermis militârs che a vegnaran sù prime des cjasis e a lis sclavitûts militârs che ur daran, par zonte, ai paîs taramotâts!

O sin di bessôi ancje a rivuart dal mont de science e de tecniche

Se chest Stât al è une disgracje che nus tocje di glotile, almancul par cumò, si podeve sperâ che almancul la culture e podès movisi par trois ducj siei. Invezit, vêso sintût che i inteletuâi si fossin dâts dongje, par studiâ cemût salvâ l'impostazion de civiltât furlane, cemût salvâ lis comunitâts dai paîs e sconzurâ la prospietive dal pletonament in citâts cence muse?

Vêso sintût che i ingegnîrs e i architets si sedino dâts dongje par studiâ une tipologjie de nestre cjase rurâl, e proponile a largje plete, par tignî cont dal stamp de nestre urbanistiche, par rispietâ l'onestât dai nestrîs centros paesans?

E vêso mai sintût che chêi de scuele a vedin fat alc di fuart, in chescj moments, pe lenghe e pe culture de nestre int furlane?

E la province di Udin?, che e veve fate une cunvigne su lis lenghis e la culture dal Friûl e dopo un an no à nancjemó publicâts i ats? No! di certis robis no si cjacare. E se si cjacare, si fasilu a talian vie: dî, par butâ fum tai vôi!

E la cuistion dai centros storics plui impuartants? il spieli de nestre anime; che a àn vût il coragjo di cjacarânus di «falsi storics», par judânus a dismenteâ ancje la nestre storie ... Il mont de culture,

furlans, dulà isal?
E nô o sin cà: di bessôi.

E di bessôi nus à lassât la glesie

Par esempi: ce fasie la «Spice» de Glesie di Udin par parâ la sô int sbefade te sô juste pretese (125.000 firmis!) di vê une universitât e no un ratatui? Parcè tasial sar vescul Battisti? Cui pensial di imbagolâ disint che nol vûl fâ politiche? Come che al è un Diu ancje pal puar, nissun gjavarà il pecjât che, tasint, al à fat la politiche di chei partîts che a frucin il Friûl di simpri in ca. Diu nus vuardi di un cjan di vuaite che nol sa disferensiâ lari e amî; Diu nus vuardi di une glesie che no capîs i segnos dai timps e dai lûcs!

E cemût le metîno cul tratament «speciâl» che ur fasês ai predis impegnâts pe Furlanetât? Vualtris o compatîs se un al vîf dome par fâ bêçs, se un al va a feminis, se al sta tun paîs dome par invelegnâ la int, se un, impen dal Vanzeli al predicje il marxîsim e se nol dopre nancje il cjâf; ma puar mai chel ch'al vûl jessi onest ancje viers la sô int, che Diu le à fate furlane: chel al è segnât par simpri!

E ce nus vêsò fat des sembleis (predis e laics) di Udin e massime di Aquilee, cuant che o vin cirût di fevelâ di un vanzeli pe nestre int? E vualtris o vês soterât dut! E la messe par furlan, che ancje se al vegnis fûr un Crist bastart se si lu clame cu la lenghe dai nestris sudors? Ben: isal chest il cont ch'ò tignîs la vuestre int?!

Ma ce che al dûl di plui al è viodi cemût che ancje la glesie si lasse pierdi daûr des plais dal consumisim che al è la muse plui vere dal materialisim in di di vuê.

La diocesi di Udin, cui bêçs dal taramot e fasarà fâ sù ricoveros pai vecjos; no migo incoragjâ i zovins a fâ cualchi stanzie in plui parcè che l'anzian al resti in cjase, come che vevin mutivât i predis de Cjargne, e come che al vûl l'Eterno Pari ...!

Le stesse plee si le da `es decisions che a rivuardin i nestris paîs; lis sanis trinceis là che e sgrîpîe ancjemò, graciant Idiu, la nestre anime libare, fuarte, salvadie e furlane.

Ben, dopo che chêi de pulitiche nus àn sierade la scuele, la latarie e ce, par puartânus tal mâr grant, no passe dî che no si sieri ancje cualchi glesie. E i predis si ingrumin tes citâts; là che si cor cui timps. Cun dutis lis benedizions...!

Ma ce dutrine difarent dal materialisim, dal consumisim e des speculazions predicjial chest gleseam?

**Par chest, par dut chest, furlans,
nô o sin ca, di bessôi**

E je grivie scombatî di bessôi; massime in moments che si è par tiere come cumò. Ma capinle une buine volte che al è piês ancjemò inludisi di vê amîs e fidâsi di lôr... e lôr, invezit, a son come chêi che o vin cjararât parsore! Miôr alore cjalâ la veretât in muse. Come che o vin savût fâ, dopo di chês âltris milante disgraciis de nestre liende.

Che, dal rest, al è ancje just: che la nestre storie, o tignedin nô il so tamon!

Editoriâl de La Patrie dal Friûl di Genâr dal 1979, n. 1